

Ekwo-ozì, Pòlu Deru Nù Ndu

Efesòsu

1 ¹Ọwa-a bụ ẹkwo-ozì, mụbe Pòlu ede. Mu bụ onye Chileke ọtáru mee ẹ ẹ mu bụru onye-ishi-ozì Kéreshi Jizòsu. Mu ede iya anụ ndu dū-nso, bu ẹ Efesòsu; mbụ ndu kwetarụ ẹ Kéreshi Jizòsu; ẹphe l'iya tũgba bụru nanụ.

²Mu sụ ẹ Chileke, bụ Nna anyi ẹ Nnajiuphu, bụ Jizòsu Kéreshi mee-ru unu eze-iphe-oma; mekwaapho g'unu buru l'ẹhu-guu.

Ọnu-oma, shi l'ẹka Kéreshi

³Unu g'anyi kele onye ono, bụ Chileke bya aburu Nna ẹ Nnajiuphu anyi Jizòsu Kéreshi ekele; onye bụ iya ọru ọnu-oma nù anyibe ndu anyi ẹ Kéreshi tũgbaru bụru nanụ. Ọnu-oma ono bụ ẹ Chileke meru; anyi shi Kéreshi l'ẹka yiru l'ọha imigwe. Ọ bụru ẹka o shi bụ l'o wotaru iphe, bụ-kotakpoo iphe, aanụ anunu, shi l'ẹka ono woru nù anyi. ⁴Chileke byaru eme mgboko; o vuru ọzo shi l'atũgba ono, anyi ẹ Kéreshi tũgbaru bụru nanụ ono; ọtáhawaro anyi g'anyi bụru ndibe iya; k'ọphu anyi a-duru iya iche; bya aburu ndu adudu ẹka ntũcha a-dụ l'ẹhu anyi l'iphu iya. ⁵Ọo n-yemobu iya meru g'o gude ọ chihawa iya l'idzù dobe l'anyi a-buru unwu iya; onye oo-shi l'ẹka bụru Jizòsu Kéreshi. Ono buerupho iphe, dũhawa iya ree ememe bya abukwarupho iphe dū iya l'uche; ⁶g'anyi etuje Chileke ẹpha k'eze-iphe-oma ono, dū biribiri ono, o meru anyi ẹ mmanụ ono; mbụ anyibe ndu anyi ẹ Nwa iya ono, o yeru obu ono tũgbaru bụru nanụ.

⁷Mbụ-a; Nwa iya ono ẹ gbashikwaru mee ya; gude gbata anyi; tẹme ọ bukwaru iya pho bụ ẹ Chileke aguru anyi nvu l'iphe-ẹji anyi. Sụ-a; eze-iphe-oma ono bụru iphe-oma, kwatakpooru paa ẹka ẹ o meeberu anyi ẹgube ono; ⁸mbụ eze-iphe-oma ọphu ọ kwatakpooru gude mmamiphe yele nkwananya saa ẹka ọkpobe asasa meeru anyi. ⁹Ọ byakwapho bya emee g'anyi maru iphe; nweru ọkpobe egomunggo; k'ọphu iphe, oome e-doje anyi ẹnya. O meru; anyi bya amaru iphe, shi bụru iphe, o domiru edomi, bụ iphe, ọ rihawaru ẹ ya e-shi Kéreshi l'ẹka mee. ¹⁰Iphe ono, ọ tũberu ono, bụ iphe,

oo-me teke o gbaru ono bu l'oo-tuko iphe, o gude eka iya mee tuko chigbabe; mbu iphe, du l'igwe; me ophu du l'ali; l'o woru Kereshi mee ishi iya.

¹¹ Oo Kereshi be anyi l'iya tugbaru; o buru iya meru g'anyi yiru l'iphe ono, o kweru ndu bu nkiya ukwe iya ono. O buru iya mekwarupho g'o gude Chileke, emekotaje iphemiphe g'o tubehawaru iya; mee ya g'o du iya l'uche; vuhawaru uzo hotahawaa anyi. ¹² Oo ya bu g'anyibeda, bu ivuzo ele enya Kereshi egude umere anyi l'ophu egoshi g'odu-biribiri Chileke habe shii; g'ee-gude iya jaa ya ajaja.

¹³ Nokwapho g'o du unubeda; l'unu numauerupho okpobe ozi ono, bu ozi k'adzota ono, Chileke dzotaru unu ono; unu kweta ke Kereshi. O buru iya bu le Chileke egude Unme-du-Nso, o kwetaru ukwe iya; mee unu iphe-ohubama; gude goshi l'oo ya nwe unu. ¹⁴ Unme-du-Nso ono egoshi l'anyi a-nata-a iphe ono, Chileke kweru ndibe iya ukwe iya ono, bu iphe, anyi a-nata teke Chileke a-gbata ndibe iya okpobe agbata ke mkpochi-ishi; g'anyi jaa odu-biribiri iya ajaja.

Polu epfu anu Chileke

¹⁵ Noo iphe, meru g'o gude mu numachaa k'ekwekwe unu kweru ke nna-jiuphu, bu Jizosu waa k'obu unu yekotaru ndu-nso ono; ¹⁶ ebe o dudu teke mu ekelebhujeru unu Chileke ekele. Mu -nodu epfu anu iya; be mu epfujekwaru iya pho opfu ehu unu. ¹⁷ Mu asuje ge Chileke ke Nnajiuphu anyi Jizosu Kereshi; mbu Nna bu O-ka-le-biribiri; g'o nu unu Unme iya, e-me unu g'unu maru mmamiphe; phua ophulanya; k'ophu unu a-maru iya okpobe amaru. ¹⁸ Mu asujekwa iya pho g'o mee obu unu g'o huma iphoró iya; k'ophu unu a-maru iphe, bu iphe, o kuru unu g'unu le enya iya; makwarupho l'iphe, o kweru ndu-nso ukwe iya nyiberu anyibe. ¹⁹ Wakwapho g'ike iya ono, bu ike ophu enweddu etu ono emeberu ire lehu anyibe ndu kweru ke Jizosu. Ike ono, l'eme ire lehu anyi ono be bukwa iphe lanu yee eze ike iya ono, ²⁰ bu iya bu ophu o gude mee ge Kereshi shi lonwu teta dzuru ndzu; bya eworu iya dobe lekutara iya imigwe. ²¹ Kereshi ono no-ngokotaru iphe, bukotakpoo ochi-oha imigwe; mekpoo o-no-loke-okwa imigwe gephe ha; mekpoo o-gude-ike imigwe gephe ha; mekwapho nnajioha imigwe l'ophu; mekpoo iphe, bukpo iphe, e kuru epha l'eliphe-a; mekpoo l'eliphe ophu abya nu. ²² Chileke meru ge Kereshi tuko iphemiphe zopyabe l'okpa; bya ewokwaru iya pho yeru Chiochi g'o buru iya l'a-buru ishi iphemiphe kpoo. ²³ Chiochi l'ophu bukwa ogwehu Kereshi; o buru l'echilabo ndu Chiochi be iphe ke Kereshi dzuru edzumedzu. O bukwanuru le Kereshi be iphemiphe ke Chileke dzukwanuru edzumedzu.

Eshi lonwu bahu le ndzu

2 ¹ O duru teke unu shi buru ndu nwuhuru anwuhu. O buru iphe, kparu iya nu bu l'unu te eyejeduru Chileke onu; unu nodu anoduje

eme iphe-*ēji*. ²Teke ono bē unu shi etso *ēka* ndiphe. Unu shi anōduje eme iphe, epherephere pfuru, b*ū* iya b*ū* onye o*ph*u, b*ū* onye-ishi l'ephekerephe bya aburu o*b*vu ono, l'emeje g*ē* nemadz*ū* kwefuru Chileke ike ono. ³Anyi*bedua* g'*anyi* ha shikwa t*ū*ko etso *ūzo* ono. Anyi shikwa etso*ēpho* iphe, ag*ū* anyi *ēgu* ememe. Iphe, anyi shi emeje b*ū*erupho iphe, d*ū* anyi ree l'*ēhu*; m*ē* iphe, d*ū* anyi ree l'egomunggo. Anyi shikwa l*ē* mb*ū* b*ū*ru ndu shi tukotawaa oke-*ēhu*-eghu k*ē* Chileke k*p*ube onwanyi g*ē* ndu o*ph*uunapho.

⁴Obenu l*ē* Chileke b*ū* onye aph*ū*je obu-imemini; p*h*ūa k'etsutsu iya. O yeru anyi obu yeghar*ū* iya anyi *ēka*. ⁵Anyi shi l'emeswe, anyi mesweru Chileke; b*ū*ru ndu nw*ū*huru anw*ū*hu. Obenu l*ē* Chileke mewaru; anyi l*ē* K*é*reshi t*ū*ko bya adz*ū*ru ndz*ū*; o b*ū*ru eze-iphe-*ōma* iya b*ē* o gude dz*ōo* unu. ⁶Anyi l*ē* K*é*reshi Jizōsu t*ū*gbaru b*ū*ru nan*ū*; Chileke t*ū*ko anyi l'iya mee; anyi teta dz*ū*ru ndz*ū* bya emekwapho g'*anyi* l'iya t*ū*ko nōdu l'imigwe. ⁷Iphe, o gude mee ya nno b*ū* g'*oo*-mecha goshi o*g*bo o*ph*u nō l'iphu eze-iphe-*ōma* iya o*ph*u nyi*beru* oke anyi*bē*; waa g'*oo*-goshi p*h*ē g'*obu* o*maa* ya, shi l'*ēka* K*é*reshi habe l'*ēhu* anyi. ⁸Oo l'*ōo* l*ē* Chileke men*ū*karu eze-iphe-*ōma* meru g'*o* gude o dz*ōo* unu. Adz*ō*zo ono shi l'ekweta, unu kwetar*ū* k*ē* K*é*reshi; o t*ō* b*ū*kwa unu b*ē* o shi l'*ēka*; o b*ū*epho iphe-*ōma*, Chileke meru unu k*ē* mman*ū*; ⁹o*ph*u o b*ū*du iphe, e setar*ū* l'akanya; g'*ō* t*ō* d*ū*kwanu onye e-gude iya wata eku onwiya. ¹⁰Anyi t*ū*kokwaru b*ū*ru iphe, Chileke gude *ēka* iya mee. O shi K*é*reshi Jizōsu l'*ēka* kee anyi; k'*o*ph*ū* anyi a-d*ū*je ike je o*k*pobe ozi, o kwak*ō*behawaru anyi g'*anyi* jee.

Aburu nan*ū* l'ime K*é*reshi

¹¹Oo ya b*ū*; unu nyatakwa iphe, unub*ē* ndu ab*ū*du ndu Jiu shi b*ū*hawaru. Ndu Jiu shi ekuje unu akpapyi. *ē*phebedua nōdu ekuje onwoph*ē* ndu buru *ū*bv*ū*. O*l*e *ū*bv*ū*, *ē*phe buru b*ū*epho iphe, nemadz*ū* gude *ēka* eb*u* l'eli *ēhu*. ¹²Unu nyataj*ē*kwa l*ē* teke ono b*ē* unu te eshidu nōdu K*é*reshi l'*ēka*; unu shi b*ū*ru ndu o*h*ozo, a g*ū*furu ag*ū*f*ū* l*ē* ndu *ī*zurel*ū* t*ē*me unu b*ū*ru mbyambya, o*ph*u unu eshidu d*ū* l'ukwe-iphe, Chileke kweshiru ndibe iya ono. O*ph*u o d*ū*du iphe unu shi ele *ē*nya iya l*ē* mgboko-a. O*ph*u unu eshidu maru onye Chileke b*ū*. ¹³Obenu l*ē* nta-a b*ē* o shiwaa l'*ēka* K*é*reshi; onye unu l'iya t*ū*gbaru b*ū*ru nan*ū*; Chileke kuritaru unu ntse; l'unub*ē* ndu shi nōdu iya *ū*zenya; o b*ū*ru mee K*é*reshi b*ē* e gude mee ya. ¹⁴O kwa K*é*reshi l'onwiya b*ū* *ēhu*-guu k'*anyi*; y*ē*bedua, meru anyi*bē* ndu Jiu m*ē* ndu ab*ū*du ndu Jiu; anyi b*ū*ru ndu lan*ū*. T*ō*budu iya b*ū*; o shi *ē*gube ono nwukpofu ndumashi ono, shi b*ū*ru igbulo n*ō*-buh*ā* anyi l'unu ono. ¹⁵Iphe, o meru b*ū* l'*o* meru; o*ph*u ekemu ereh*ē*du ire; mb*ū* ekemu ndu Jiu m*ē*kpoo ns*ō* ns*ō*; m*ē* omelal*ī* omelal*ī*, d*ū*kota iya n*ū*. Iphe, Chileke eme g'*o* mee b*ū* g*ē* K*é*reshi e-shi *ē*gube ono gude mba labo ono metaru onwiya ndu lan*ū*, *ē*phe l'iya t*ū*gbaru b*ū*ru nan*ū*. Ndu ono aburu m*b*à o*ph*h*ū*ú. Oo ya b*ū*

l'o gude egube ono mee ge nchi du doo. ¹⁶Kéreshi egudekwapho anwuhu ono, o nwuhuru l'oswebe ono; mee ge ndumashi ono bvụ. Oo ya bu; g'o gude anwuhu iya l'oswebe ono; mee ge mba labo ono buru nanu. Oo ya bu g'ooduphuta phe azu dupfuta Chileke. ¹⁷Noo iphe, Kéreshi gude bya; bya ezidzuru g'a ha ozi-oma nchi-adu-doo ono; zia ya unube ndu shi nodu Chileke uzanya; zikwaa ya pho ndu shi nodu iya ntse. ¹⁸Kele o bu iya be o shi l'eka anyinebo tuko buru ndu aduje ike gude Unme lanu bya apfuru l'iphu Nna.

¹⁹Oo ya bu; l'unu ta abuhedu nlwamulwa; ophu unu abuhedu ndu ohozo. Nta be unu buwaa ndu ephe le ndibe Chileke tukoru buru ndu a nwuru l'eka lanu; unu tukowaru buru ndu onu-ulo Chileke. ²⁰Nta-a be Chileke gudeakwa unubedua akpu-tse ulo iya ophu ndu-ishi-ozu me ndu shi epfuchiru Chileke turu okpa iya. O buru Kéreshi Jizosu lonwiya bu mkpuma, gude ulo obu. ²¹Oo ya bu onye gude ulo ono g'o ha gudeshia ya ike bya aburu iya e-me g'o vua buru eze-ulo, e doberu Nnajiuphu nsọ. ²²Nokwapho g'unu l'iya tugbaru; o tukokwapho unu akpu; unu le ndu ozo g'a kpa unu akpukpu g'ulo; g'unu buru eze-ulo, Chileke e-shi l'eka Unme-du-Nso buru.

Ozi, Polu ejeru ndu abudu ndu Jiu

3 ¹Noo g'o gude mube Polu, onye noru Kéreshi Jizosu mkporo l'iswi ehunube ndu abudu ndu Jiu; nodu anoduje epfu anu Chileke. ²O doru mu enya l'unu numawaru le Chileke shiwaa l'eme eze-iphe-oma iya ono; ye mu ozi-a l'eka su ge mu jee; g'oduru unu le ree. ³Ono buru iphe, e domiru edomi e meru ge mu huma l'ophulanya. Ge mu dehaawaru iya unu le mbu; ole mu gburu iya mkpirikpu. ⁴Unu -gupho iphe, mu dehawaru; unu agbe l'eka ono maru g'o doberu mu enya; mbu iphe ke Kéreshi ono, e shi domia edomi ono. ⁵Le teke ndiche be Chileke te eshikwa emeje ge ndiphe maru iphe nkiya ono, o domiru edomi ono. Obenu le Chileke shiwaa l'eka Unme-du-Nso nkiya togbo iya eba nta; k'ophu ndu o hotaru dobe iche; mbu ndu-ishi-ozu iya me ndu mpfuchiru iya a-maru iphe ono. ⁶Mbu le ndu abudu ndu Jiu be ephe le ndu Jiu gbawaa mgba l'onu-oma ophu shi l'eka Chileke. Ephe tukoru dzepfuwaa l'ehu onye lanu; tuko yiwaru l'ukwe-iphe, Chileke shi l'eka Kéreshi kwee. O buru ozi-oma ono meru g'anyi maru iya nta.

⁷Oo ozi-oma ono be mu ese akanya iya. Chileke hotaru mu ge mu jeje ozi-oma ono; ono buru eze-iphe-oma, o meru mu ke mmanu. O gude nno goshi mu g'ike iya erebe ire l'ehu mu. ⁸L'iphe, bukpo ndu enya lwaru le ndu ke Chileke bu mu be o kachaa alwalwa; o bukeru mbedua-a be Chileke gbemeeru eze-iphe-oma ono ke ge mu buru onye e-tsoru ohamoha; pfukashiaru ndu abudu ndu Jiu k'eze-iphe-oma ono, shi l'eka Kéreshi ono paru eka; k'ophu nemadzu ta asudu g'oo-rivu g'o habe. ⁹Oo mu be o yeru

gę mu mee gę ndiphe l'ophu huma gę Chileke eshije eme iphe, ọ tųberu. Chileke onye bų iya meru iphemiphe chihawaru iphe ono; tęme o mee mgboko; ọle o shikpọephọ e -shi teke ono domia ya edomi. ¹⁰Ọ bųru nta-a bę Chileke shi Chiochi l'ęka mee gę ndu ọchi-ọha imigwe; mękpoo ndu ọ-nọ-l'oke-ọkwa imigwe maru gę mmamiphe Chileke gbaębekotaru. ¹¹Chileke tųkoru iphemiphe ono mee g'ọ riru iya rọ l'edenwede. Ọ bųru onye o shi l'ęka mee ya bų Nnajiuphu anyi, bų Kęreshi Jizọsu; ¹²onye anyi kwetarų nkiya bya emee; anyi l'iya tųgba bųru nanų; k'ọphu obu te eteędu anyi ophe; anyi nweru ọnu-opfu; tęme anyi nweru ęka anyi a-pfuru pfushia ike l'iphu Chileke. ¹³Noo g'o gude mu nọdu epfuru unu sų: jiko g'unu te egudekwa k'iphe-ęhuka-a, mu eje l'opfu ęhu unu-a; tuwoo Kęreshi ęka; l'ọ bųkwa iphe e-wotarų unu ọbvų.

Eye obu, Kęreshi yeru anyi

¹⁴Ọo iphe ono meru g'o gude mu nọdu anọduje egbu ikpere l'ali epfu anų Chileke, bų Nna; ¹⁵onye bų iya bę ipfu l'ipfu l'imigwe mę l'eliphe shi l'ęka gbube ishi ndzų phe. ¹⁶Mu anọduje epfu anų Chileke g'o shi l'ọdu-biribiri iya, nyiBERU anyibe gbę l'ęka Unme iya, dų Nso; nų unu ike g'obu shihu unu ike; ¹⁷gę Kęreshi bata bya eburu unu eburu l'ime obu; eshinu unu kweru nkiya; wafųa g'eye obu mee unu g'unu gbaa ọgbarabvu nguru anguru; ¹⁸g'unu lę ndu-nso g'ęphe hakọta aduje ike g'o doo unu ęnya; mbų gę adzọta, Chileke dzọtarų unu habe ọsa; waa g'ogologo iya habe; mę g'ọ habe l'eli; mękpoo omilomi iya; ¹⁹g'unu makwaruphọ lę n-yemobu kę Kęreshi parų ęka; k'ọphu ọ dųdu onye abya iya amaęberu. Ọo ya bų g'aatųko gę Chileke gbaru; humagbukotakpoo l'ęhu unu.

²⁰Chileke aduje ike meeru anyi iphe megharų iya ęka mebyikpọo ọkpobe emegharu; mbų mechaa meghata g'anyi aduje ike sų g'o mee; mechaa mee ọphu anyi ari-vuduru l'egomunggo. Egbube ike ọwa-a, o gude ere ęgube ire ọwa-a l'ęhu anyi-a shihukwaru ike. ²¹G'e shi Chiochi l'ęka tuje iya ępha; shikwaphọ l'ęka Kęreshi Jizọsu tuje iya ępha jasų lę tuutuutuu lę miiimii. Nokwa g'ọ dų.

Ndu etso Jizọsu bų nanų

4 ¹Noo g'o shitaru mbędua, bų onye a tųru mkpọro; opfu lę mu ejeru Nnajiuphu ozi-a nọdu arwọ unu sų g'unubę ndu kę Chileke dzųru ndzų meje iphe, Chileke tųberu teke ono, ọ họtaru unu ono. ²Unu wozekwa onwunu ali; unu emeje gelee bya abųru ndu atajerų iphe nshi; ndu atagbuje iphe nwibe unu meru unu lę nshi; gude egube ono goshi l'unu yeru nwibe unu obu. ³Unu kukebeje ęhu g'unu ta aha abųru nanų ono, Unme Chileke meru g'unu bųru ono. Gę Chileke mee gę nchi dų unu doo g'unu lę nwibe unu abųru nanų. ⁴Sų-a; ọ kwa ogwehu lanų dų; waa Unme-dų-Nso lanų; nokwaphọ g'ọ bų iphe lanų bę Chileke kuru anyi

g'anyi le ɛnya iya. ⁵Ɔo Nnajiuphu lanu du; o buru ekweta lanu du; no-kwapho g'o bu baputizimu lanu du. ⁶Ɔo Chileke lanu du; onye bu iya bu Nna anyi g'anyi ha; bya aburu iya no-ngokotaru; bya egudekota onyemonye eje ozi iya; bya eburu l'ime onyemonye.

⁷G'anyi ha l'onye l'onye be Chileke mekotaru eze-iphe-oma. O buru ge Kereshi gude kee ya bu g'anyi natagbaaru iya. ⁸Noo iphe, o gude o su:

“Teke ono, o gbeshiru lasha
l'imigwe
be o dutaru igwerigwe ndu
o kpuru le ndzu lasha;
bya ekèru ndiphe iphe
ke mmanu.”

⁹O du ree; o -buru l'a suru l'o laru l'imigwe; o n'ia bu l'o vuru uzo shiada l'igwe bya mgboko rwua l'ali ree. ¹⁰O kwapho yebe onye ono, nyizetaru nu ono; nyihuru; tuko imigwe g'o ha nyighaa; k'ophu o tukoru ekameka sweta. ¹¹Ɔo ya bu onye turu aka le ndu a-buru ndu-ishi-ozu; tua aka le ndu ophu a-buru ndu mpfuchiru Chileke; me ndu ophu a-buru ndu-ozu-oma; me ndu ophu a-noduje eleta Chiochi ɛnya bya atukwapho aka le ndu ophu a-noduje ezi opfu Chileke. ¹²Iphe, o gude mee ya nno bu g'o shi phe l'eka mee ndibe Chileke; k'ophu ephe a-du ike jeeru Kereshi ozi-a; wafua k'ophu ogwehu Kereshi ono e-tsehu etsehu. ¹³Noo g'oo-du jasu teke anyi a-tuko buru ndu tugbaru nanu; opfu l'anyi tukoru kweta ke Nwa Chileke ono; me opfu l'anyi majiru iya ɛnya. Noo iphe, e-me g'anyi bukwarupho ndu e-tsefuta; buru mkpurophu onye lanu, dzuru oke l'ime Kereshi. ¹⁴Anyi taa bueduru unwegirima, a-noduje akwaphu akwaphu; ndu e gude iphe opfu, shi l'ejo nzi ephe anoduje ezi; gude eregede me ugho edepushi. ¹⁵Iphe, anyibedua g'emeje bu g'anyi yeje nwibe anyi obu; pfuje ire-lanu; g'anyi egudeje egube ono evu evuvu l'iphemiphe; evu evupfu Kereshi, yebedua bu iya bu ishi anyi. ¹⁶Ɔo ya emeje g'ogwehu l'ophu dzepfua le nkwo iya le nkwo iya; buru nanu. Teke ono be ogwehu l'ophu a-tuko evu evuvu; shihu ike; eshinu iphemiphe, e meru; o du l'ehu tukoru emegbaa g'o gbaru iya. Nokwapho g'oo-du l'ehu Kereshi me ndu nkiya -yee nwibe phe obu.

Ndzu ophuú, shi l'eka Kereshi

¹⁷Ɔo Nnajiuphu be ziru mu nu ge mu pfua ya pfushia ya ike su ge ndzu unu ta aduhekwa ge ke ndu ta amadu Chileke; ndu egomunggo swehuru; ¹⁸ndu oriri phe gbakotaru ochii; teme ebufu phe ge ndzu ono, shi l'eka Kereshi ono te erwube phe aka. O buru iphe, kparu iya nu bu l'ephe kpochiru okpoma; ophu o to dudu iphe ke Chileke, duru ophu ephe maru. ¹⁹Iphere buwaru phe l'iphu; ephe woru onwophe togboru umere, rehuru erehu. Ephe wata eme okorokoto iphe, adudu ree; k'ophu ephe ajiwa momo ala l'arwu urwuali, dugbaa iche iche.

20 Ọ tọ bukwa egube iphe ono bu iphe, unu nwutaru le ke Kereshi!
 21 Ophu doru enya bu l'unu numaru ke nkiya; teme e zikwaapho unu iphe, bu okpobe-opfu, du l'ehu Jizosu. 22 Oo ya bu g'unu haa ejo umere ono, bu akahu onye, rehuru erehu ono, bu iya meru ebe unu amadu l'oo onwunu be unu aghoru ugho; o bukwaru iya pho emeje; unu alaa l'iswi. 23 Ge Chileke mee obu unu; me uche unu g'o buru iphe ophuu. 24 Unu yeta umere ophuu ono g'onye yetaru uwe, bu iya bu umere ophu Chileke meru o yee ya. Egube umere ono egoshije onwiya l'okpobe ndzu, pfuru oto bya adu Chileke ree.

25 Oo ya bu; unu ta adzuphehewa aka. G'onymonye pfujeru nwibe iya ire-lanu; eshinu anyi tukoru dzepfua l'ogwehu lanu. 26 Ehu -ghuahaa unu egbu; unu te ekwekwa g'ehu-egbu ono kpataru unu eme iphe-eji. Ophu o dukwa onye e-kweje g'ehu ghua ya egbu jasu ge nchi jihu. 27 Unu te ekwekwa ge Nsetanu kpata unu uzo l'ehu. 28 G'onye shi ezi iphuru; haa iphuru; gude aka iya wata ese akanya gude setaje iphe l'uzo, pfuru oto g'oo-gudeje nno eyeru ndu ozo, no le mkpa aka. 29 Unu te epfujekwaru nwibe unu ejo opfu. O chikwa opfu oma bu iphe, e-shije unu l'onu, bu iya bu egube opfu emetse nemadzu emetse; bya akwoje ndu numaru iya nu le mkpa. 30 Unu te emekwa Unme-du-Nso ke Chileke iphe aphu. Kele o kwa Unme-du-Nso ono be Chileke gude mee unu iphe-ohubama dobe; kwaberu mboku, ya a-gbata unu. 31 Unu tukokpo k'ehu nkoko; me obu oku; me ehue-egbu paru haa. Unu haa arachije nwibe unu nchi; mekpoo ephu iphu. Ophu unu edobejekwaru nwibe unu ejo obu g'o duhabe. 32 O chia g'unu mejeru nwibe unu odo; pfujeru phe obu-imemini. Unu agujeru nwibe unu nvu; egube Chileke shi Kereshi l'eka guaru unu ono.

Umere, gbaru ndu ke Kereshi

5 1 Eshi ophu unu bu unwu Chileke, o yeru obu; unu nwuje aka iya g'unu adu g'o du. 2 Ge ndzu unu g'o ha goshije l'unu yeru nwibe unu obu egube ono, Kereshi yeru anyi obu; mia enya le ndzu iya l'iswi ehue anyi; woru onwiya gweeru Chileke eja, du Chileke ree.

3 Su-a; eshinu unu buwaa ndibe Chileke be o to gbaduru g'unu ye aka l'apharwushi onwonye me ejo ememe ililekpo. Unu te edobekwa enyapfurupfuru l'eka iphe nwibe unu no; ebe o dukwa ejo-iphe ono, unu e-jejekpo ephota ephota ilile l'eka unu no. 4 Ophu o dukwa teke unu epfuje ejo epfufu; ozoo tukpo tukpo tukpo opfu; ophu unu atujekwa ejo ntu-onu. O chia iphe, unu e-meje bu g'unu noduje ekele Chileke ekele. 5 L'ophu unu a-tube nvu bu l'o to dudu onye arwu urwuali; ozoo onye eme ejo ememe; ozoo onye enyapfurupfuru, abya abahu l'eka Kereshi waa Chileke bu eze. Onye enyapfurupfuru dua g'onye agwa iphe.

6 Unu te ekwekwa g'o duru onye e-gude mppokoro opfu dephua unu. O kwa iphemiphe ono bu iphe, e-me ge Chileke tukoshi ndu te eyejeduru

iya ọnu oke-ẹhu-eghu iya. ⁷Ọo ya bụ; g'unu l'ẹphe ta swijekwa ọswi. ⁸Unubedua l'onwunu shi ọdugbaa l'ọchii; ọle nta-a, unu bụwaa ndibe ọ Nnajiuphu-a bẹ unu ọakwaa l'iphóró. Ọo ya bụ g'unu meje umere, e-go-shi l'unu bụ ndu ọ l'iphóró. ⁹Kele iphe, ìphóró akpatajẹ bụepho ọkpobe eme ọma; mẹ apfubekoto; mẹ ire-lanu. ¹⁰Unu kukebeje ẹhu nwujẹ eme iphe, dọ Nnajiuphu ree. ¹¹Unu te etsokwa ndu ono, l'eme iphe, abaduru urwu, bụ iphe, ndu ọ l'ọchii emeje ono. Unu wojechiaru iphe ono, ẹphe emeje ono tujeru pẹ jalaa l'iphu. ¹²L'iphe ono, ẹphe anọduje eme lẹ mpya ono duta-beru ẹji k'ọphu iphere iya te ekwekpodanu g'e je iya ephota ilile. ¹³Teke e wofutakotawaru iphemiphe l'iphóró bẹ a humakotawaru g'ọ gbaru; ¹⁴kele iphemiphe, bukpo iphe, e wofutawaru l'iphóró bẹ bụwaa ìphóró l'onwiya. Noo g'ọ gude a ọdu epfuje sụ:

“O-ku-mgbenya;
tehu nwuru ẹnya!
Shi lanwuhu,
ì nwuhuru teta
gbalihu!
Gẹ Kéreshi buri ìphóró
chiahaa l'ẹhu ngu.”

¹⁵Ọo ya bụ; unu kwakwaa ẹnya l'ẹgube umere, unu emeje nta. Unu meje gẹ ndu maru iphe; te emehẹ gẹ ndu amadụ iphe. ¹⁶Teke ọ duru nwuzo, unu kpatarụ k'eme iphe, dọ ree; unu ta ahajekwa iya g'ọ laa l'iswi; opfu l'iphe-ẹji paakwaru ẹka lẹ mgboko nta. ¹⁷Ọo ya bụ; unu ta abụekwaru ndu eswe. Unu seje g'unu maru iphe, dọ Nnajiuphu ree g'unu meuru iya.

¹⁸Unu ta angujekwa mẹ k'ọphu ọo-tsụ unu atsutsu; kele ooduba-je l'iphere abvụ l'iphu. Ọ chikwaa iphe, unu e-meje bụ g'unu kwe gẹ Unme-dụ-Nsọ ji unu ẹhu. ¹⁹Unu gudeje ebvụ ọma; mẹ ebvụ ekele; mẹ ebvụ ọzowaro, shikota lẹ Unme-dụ-Nsọ gude pfuru nwibe unu opfu. Unu gujeru Nnajiuphu ebvụ ekele; unu agujekwaru iya phọ ebvụ ọma. Unu egudejekwaphọ obu unu kele iya ekele. ²⁰Unu gudeje ẹpha Nnajiuphu anyi, bụ Jizosu Kéreshi keleje Chileke, bụ Nna ekele k'iphemiphe.

Umere, gbaru nwoke yele nyee ya

²¹Unu wozejekwa onwunu alị l'ẹka nwibe unu ọ; gude nno goshi l'unu kwabẹru Kéreshi ùbvù.

²²Unubẹ unwanyi; unu wozejekwa onwunu alị l'iphu ji unu; g'ọ bụ Nnajiuphu, bụ Kéreshi bẹ unu emeru iya. ²³L'ọ kwa nwoke bụ ishi nyee ya ẹgube ọ bụ Kéreshi bụ ishi Chiochi; bya abukwarupho Onye-Ndzoa ogwehu iya ono. ²⁴Ọ kwaphọ gẹ Chiochi wozeru onwiya alị l'iphu Kéreshi bụ g'unwanyi e-wozeje onwophe alị l'iphu ji, alụ pẹ nù l'iphemiphe.

²⁵Unubẹ unwoke, unu yeje nyee unu obu gẹ Kéreshi yeru Chiochi; wo-ru ndzụ iya nù opfu ẹhu Chiochi. ²⁶Iphe, o gude mee ya bụ g'ọo-buru: o

-gudechaa mini yee opfu onu iya saa Chiochi o du ree; l'oogude iya mee ya g'o duru Chileke iche; 27k'opfu oo-kulataru onwiya Chiochi ge nwanji, eje alu ji; mbu nwanji ama mma, adudu iphe, takuru iya lehu; ophu iphu te esedu iya eli; me iphe ozo, dukpoo egube ono; bya aduru Chileke iche; ebe o dudu aka uta du iya lehu ilile. 28Nokwapho g'unwoke e-yeje nyee phe obu g'ephe yeru onwophe. Nwoke, yeru nyee ya obu bukwa onwiya b'o yeru obu. 29O to dudu onye akpoje ehu iya ashi. O chia iphe, oomeje bu azuzu be onoduje azu iya; eleta iya enya. Nokwapho ge Kereshi emejeru Chiochi. 30Kele o kwa anyi bugbaa mpukashi, du l'ogwehu iya. Anyi bu anu-ehu iya me okpu iya. 31"Noo g'o gude nwoke je l'aha ne iya; haa nna iya je; yeje nyee ya atugba. Ephenebo atuko buru onye lanu." 32Iphe ono buru iphe, e shi domia edomi. Iphe, mu epfu opfu iya ono bu ke Kereshi yeje Chiochi. 33Ole oopfukwarupho unu lehu lehu; su l'onyenonu yefutaje nyee ya obu g'o yeru onwiya; ge nwanji nonu goshije le ji iya duru iya le nsu.

Umere, gbaru unwegirima me ndu nwuru phe nu

6 1Unube unwegirima; unu mejekwa iphe ndu nwuru unu, kweru ke Kereshi suru g'unu mee. Kele oo iphe, du k'ememe be o bu. 2"Kwabeje ne ngu le nna ngu ubvu;" bu iya bu ekemu mbu, Chileke kweru ukwe-iphe tukobe. 3"G'oo-duru ngu le ree waa g'ikakwapho nka le mgboko-a." 4Ndu bu nna; unu te emejekwa unwegirima unu iphe e-ghu phe egbu. O chikwa iphe, unu e-meje bu g'unu zije phe iphe; huje phe ahuhu l'uzo ke ndu bu ndibe Kereshi.

Ndu bu ohu yee ndu nwe phe nu

5Unube ndu bu ohu; unu mejekwa iphe ndu bu nnaji unu k'eliphe-a ziru unu. Unu gudejekwa ndzu-agugu; me obu awa mini me iya. Unu gudeje-kpopho obu iphoro me iya; g'unu emeru iya Kereshi. 6O to bukwaphe teke ephe ele unu enya be unu emeje iya gee-shi g'ephe ajaa unu ajaja. O chia g'unu gudeje obu unu meje iphe, du Chileke ree, bu iya bu iphe, gbaru ndu bu ohu Kereshi. 7G'ehu tsojekwa unu utso g'unu je ozi unu l'unu bu ohu ejeru Nnajiuphu, bu Jizosu ozi; o to budu nemadzu mmanu be unu ejeru iya. 8Unu nyatajekwa le Nnajiuphu, bu Jizosu l'e-bu onyemonye obunggo iphe, du ree, o shi emeje; me ?i bu ohu-o; me ?i bu amadu-o. 9Unube ndu bu nnaji; unu mejekwarupho ohu ge mu suru g'ephe mejeru unu ono. Unu hakwaa phe eye ebvu. Unu nyatajekwa l'unu l'ohu unu tukoru nweru Nnajiuphu lanu l'imigwe. Yebdua be onyemonye ha enya nhamunha l'iphu iya.

Ngwogu, Chileke anuje unu

10Iphe, mu e-gude kpochia ya ishi unwunna mu bu; unu noshia ike leka Nnajiuphu; g'ike iya, nyiberu anyibe mekwa unu g'unu shihu ike.

¹¹ Unu tũko ngwogu, shi l'eka Chileke kwaa onwunu; g'unu adũkwanu ike pfuru pfushia ike l'ejo ugho ke Obutuswe. ¹² L'ọ tọ bukwa nemadzũ mmanũ bẹ anyi l'ephe alwũ ọgu. Ndu anyi l'ephe alwũ bukwa ndu ọchi-oha imigwe; mẹ ndu ọ-nọ-loke-okwa imigwe; mẹ ndu imigwe, nwe mgboko ọwa-a, agba ọchii-a; mękpoo igwerigwe ejo ojogu, nọkota l'imigwe. ¹³ Ọo ya bũ; unu chilikọta ngwogu ono, shi l'eka Chileke ono g'ọ ha! Ọo ya bũ; ejo mbọku ono -rwuępho g'unu adũ ike pfuru pfushia ike; mbũ unu -lwũ-ghechaa ya; unu akpọo abara g'unu kpọru.

¹⁴ Sũ-a; unu kwakọbe! Unu woru ire-lanũ kee onwunu l'upfu. Unu eworu apfubekoto mee uwe-ígwè ndu l'aje ọgu. ¹⁵ Unu gudeshia ozi-oma k'ẹhu-guu ono g'ọ buru akpọkpa, unu yeru g'eturu ata alọdu unu. ¹⁶ Unu gudefukwaapho ekweta, unu kwetarũ ke Jizosu g'ọ buru iphe unu e-gbobeje gude zeru onwunu; gude iya nashije apfũ, Onye-Njọ ono, bũ Obutuswe agba unu; mbũ apfũ ono, enwu ọku, shi l'eka Nsetanu. ¹⁷ Unu anata ndzọta dobe g'ọ buru okpu-ígwè, unu e-kpuru. Unu atsua opfu Chileke l'eka g'ọ buru ọgu-echi, Unme Chileke yeru unu l'eka. ¹⁸ L'iphemiphe ono bẹ unu a-nọduje epfuru Chileke sũ g'ọ yeru unu ẹka. Unu pfuje-kpọekwapho nũ Chileke gẹ Unme-dũ-Nsọ edu unu. Noo g'ọ gude unu je l'anwũjeru ẹnya mkpũrumkpuru. Unu ta ahakwa epfu anũ Chileke l'iswi ẹhu ndu-nso. ¹⁹ Unu pfujekwarũpho nũ Chileke k'opfu ẹhu mu; gẹ mu saje opfu kpaa kpaa; mẹ mu -nọdu epfu iphe, e domiru edomi ono, dũ l'ozima ono. ²⁰ Ọo ese iswi ozi-oma ono bẹ o gude mu buru onye nọ-chiru Jizosu; egudekwarọ lẹ nta-a bẹ mu nọ lẹ mkpọro. Noo iphe, mu epfu sũ g'unu pfuje nũ Chileke gẹ mu nweru obu saje ozi-oma ono kpaa kpaa g'ọ gbaru gẹ mu saa ya.

Ekele, Pọlu gude akpọchi iya ishi

²¹ Mu mawaru l'ọo-dũ unu g'unu maru gẹ mu eme ala l'eka-a. Nwanna anyi Tikikosu, anyi yeru obu; mbũ onye e gude ire iya ẹka l'aje ozi ke Kéreshi e-pfukwarũpho unu iphemiphe; k'ọphu unu a-maru gẹ mu eje iya. ²² Noo g'ọ shitaru mu nọdu ezi iya g'ọ byapfuta unu; k'ọphu ọo-kọru unu g'anyi eme ala; g'obu eshihukwanu unu ike.

²³ Gẹ Chileke, bũ Nna; mẹ Nnajiuphu bũ Jizosu Kéreshi mekwaa g'ẹhu dũ unubẹ unwunna guu; mekwaphọ g'unu yee nwibe unu obu; l'ọ mekwaphọ g'unu kweta nkiya. ²⁴ Gẹ Chileke mekwaarũpho unu eze-iphe-oma; unubẹ ndu yeru Nnajiuphu anyi, bũ Jizosu Kéreshi obu; yee ya k'ojejoje. Nokwa g'ọ dũ.